

DISCOVRS  
SVR L'ESTAT  
PRESENT, DES  
affaires du Royaume.



46

A PARIS,

Del'Imprimerie de FRANÇOIS  
HUBERT, rue S. Iacques à la  
Bible d'Or.

M. D. C. XVI.

Case

F

39

.326

161657

THE NEWBERRY  
LIBRARY

## DISCOVERS.

**T**Out ainsi que les cantarides s'attachent volontiers aux roses les plus espanoüyes : De mesme, c'est le propre de la calomnie que de se prendre à la vertu la plus eminente, n'y ayant sorte de fausseté dont les langues malignes ne taschent de raualler la gloire, qui est iustement deuë au merite d'autrui. S'il y a iamais eu siecle auquel ceste Furie se soit detachée, nous pouuons veritablement dire que ç'a esté au nostre. Car que peut l'Enfer vomir d'iniurieux, qui ne soit sorty de la bouche & de la plume de quelques forcenez, qui conuertissans la verité en mensonge ont par l'insolence & par l'audace de leurs inuectiues tellement choqué la reputation des plus innocens, qu'il sembloit n'y auoir plus de loüangen y d'honneur à bien faire. La rage & la fureur de tels maniaques s'est desbordée iusques là, que de n'esparagner les images viuantes de la Deité, la reuerence desquelles est si sacro-saincte & religieuse, que mesmes c'est blaspheme & impieté que d'interpreter sinistrement la



moindre de leurs actions : Mais comme les fleches qu'on décoche vers le Ciel semblent bien y aller , & toutesfois ne le touchent pas: De mesme telles faussetez & calomnies offensent si peu ceux contre qui on les espond , que leur vertu au contraire s'en rend tant plus illustre , ne plus ne moins qu'une goutte d'eau salée qu'on jette dans une fontaine d'eau douce , en rend par une certaine contre-poincte la saveur beaucoup plus agreable.

C'est ce qui a tousiours faict genereusement dédaigner à la Royne Mere du Roy, tous les faux bruiets qu'on a semez contre son gouvernement, se contentant de l'esjouissance de sa conscience , & du tesmoignage des plus gens de bien , qui vuides de passion , parlent des choses sans déguisement. Ce n'est pas que donnant cela à la douceur accoustumée de sa Majesté, la tache & la honte n'en demeure à jamais sur le front de nostre nation , comme ingratitude du bien qu'elle a receu de ceste grande Princeesse. Car laissant à l'Histoire de raconter à la posterité les merueilles de son administration, depuis la perte , à jamais déplorable du GRAND HENRY, ie diray seulement qu'il faudroit surmonter

le Diable en calomnie, quoy qu'il en soit le pere & l'auteur , si on ne confesse ingenuëment, que durant la minorité du Roy, cest Estat s'est conserué en plus de tranquillité qu'il ait faict sous la Regence d'aucune Princeſſe, qui ait iamais pris le gouuernail de ceste Monarchie , toutes choses y ayās esté si calmes, qu'il ne s'y est esleué aucuns orages ny guerres ciuilles. Et si le Roy entrant en sa majorité il y a eu quelques vns , qui ayans la voix de Iacob, portoient les mains d'Esäü , iettans la discorde dans le sein de la France , & rauageants ses Prouinces, comme s'ils fussent entrez en vn pays de conqueste, la Roync neantmoins, semblable à vn Medecin humain & pitoyable , au lieu du feu & du cautere , a apporté de si doux remedes à ceste calamité, que pardonnant par sa clemence, à ceux qu'elle pouuoit, si elle l'eust voulu seuerement chastier par sa iustice, elle a tout oublié, voire par excez de bonté , comme qui recompenseroit le crime, elle a fait du bien & de l'honneur à tels qui ne meritoient par leur rebellion, que de la honte & du deshonneur.

Or comme l'aragne tire son venin des mesmes fleurs, dont l'abeille fait son miel,



ily a eu aussi de ces gens là, qui au lieu de recognoistre par leur obeissance, les gratifications qu'ils receuoient d'une main si liberale, ont retourné à leur vomissement, & conuerty en poison, ce qui leur deuoit estre en aliment. Et parce qu'ils se recognoissent estre foibles de nom & d'autorité, pour esclorre leurs mauuaises intentions, il falloit qu'ils se couurissent de la qualité d'un plus grand qu'eux pour paillarder sous ce manteau, c'est à dire, pour en abusant du pouuoir d'un premier Prince du sang, retourner derechef à broüiller l'Estat, à troubler le repos public, & nous engager plus auant que iamais dans la confusion, le pauvre peuple n'ayant recueilly qu'à demy, le bien que Dieu sembloit luy donner ceste année en abondance, pour recompense de sa derniere perte & desolation.

C'est ce qui a contrainct leurs Majestez de pouruoir soudain au salut commun de la France, & d'arrester pres d'elles Monsieur le Prince de Condé, afin qu'ostant l'occasion à certains esprits violens d'abuser dauantage de sa qualité, le Royaume se contienne en vne si profonde paix, qu'il soit aussi florissant sous le regne du

Roy, qu'il a oncques esté sous l'Empire d'aucun deses predecesseurs. Ce qui est à esperer, si l'autorité Royale demeure si absoluë, qu'elle voye toute autre grandeur humiliée à ses pieds. Aussi n'est-il pas moins monstrueux de voir plusieurs attirer à eux le pouuoir du Souuerain, qu'il est contre nature de voir plusieurs testes sur vn corps. Cela estant donc arriué pour les iustes raisons que leurs Majestez en ont euës, c'est à nous, comme fidelles subiects, de ployer à leurs volontez, sans nous enquerir plus curieusement si elles auoient à le faire ou non : Car ce n'est pas à nous de penetrer dans le secret des conseils d'un grand Roy, ny d'en examiner les motifs selon nos sens, & à la mesure de nostre passion. Nous ne deuons non plus estimer que la personne de mōsieur le Prince, estat chere comme elle est à leurs Majestez, qu'elles ne la conseruent avec tāt de soing & de bon traictement, que la reseruant pour leur seruice, & pour la seureté & appuy de l'Estat, sa liberté ne luy soit renduë, lors qu'elles iugeront qu'elle sera au bien du public, & mesme du sien particulier, les Roys n'espargnans pas mesmes leurs propres Enfans, quād il y va du repos de leurs



peuples, la feuë Royne Mere nous en ayāt  
laissé l'exemple en la personne de Mon-  
sieur, frere vnique du Roy Henry III.  
qu'elle arresta prisonnier, sur l'aduis qu'el-  
le eut que certains broüillons l'auoient  
desbauché de son deuoir.

S'il y a cependant quelques ames vice-  
rées, qui controllans les actions de leurs  
Majestez, se formalisent de cela, & le pren-  
nent pour pretexte de se porter à vn nou-  
veau souleuement, il est à esperer que  
Dieu, protecteur de l'innocence d'vnieu-  
ne Roy, sçaura tellement armer son bras,  
que secondé de ses bons & fideltes serui-  
eurs, il s'opposera si puissamment à leurs  
efforts, que la confusion en tombera sur la  
teste de ceux qui seront les auteurs de  
la faction. Leurs Majestez ont desia des-  
arres si visibles de la fidelité des bons Fran-  
çois, que Paris (comme le Chef des villes  
du Royaume, & dās laquelle elles ont vou-  
lu faire ceste action, comme sur le theatre  
le plus eminent de la France, pour témoi-  
gner à tout le monde la iustice de leur pro-  
ceder) s'est, dy-je, contenu en si grande  
obeissance, qu'il n'y a bourgeois homme  
de bien, qui ne tesmoigne de l'approuuer  
sans aucun murmure ne contredict. Et s'il  
y a eu



y a eu quelques-vns du menu peuple qui se  
 soient violement comportez, se ven-  
 geans sur des choses inanimées, en hayne  
 d'un particulier, par l'induction de ceux  
 qui deuoient plustost recourir à l'eau qu'au  
 feu, leurs Majestez oublient neantmoins le  
 tout par leur bonté & clemence. De sorte  
 que soustenuës des villes capitales du Roy-  
 aume, des Officiers de la Couronne, des  
 Cours Souueraines, & de la Noblesse, qui  
 tous ensemble offrent leur tres-fidelle ser-  
 uice, pour l'interest commun qu'ils ont à la  
 manutention de l'autorité Royale, dans  
 l'establissement general de laquelle est en-  
 clos le repos & la fortune des particuliers,  
 il est à esperer avec l'ayde de Dieu, qu'el-  
 les donneront si bon ordre à toutes cho-  
 ses, que la iustice de leurs armes protegera  
 la liberté des peuples, empeschans qu'ils  
 ne soient opprimez, comme elles ont des-  
 ja pourueu à la seureté de Paris, par les  
 bonnes troupes d'infanterie & de Caua-  
 lerie qu'elles ont logées dix lieues à la  
 ronde.

La pluspart des membres du corps estās  
 ainsi reunis sous leur Chef, s'il y a quelques  
 vns qui s'en retranchent, le Roy ne laisse-  
 ra pas d'estre seruy & assisté, ainsi que cest

Empereur, qui apres la mort de Britan-  
 nus disoit, qu'ayant perdu le secours de son fre-  
 re, toute s<sup>on</sup> esperance gisoit en la Republique. Car  
 si quelques Grâds n'ayans que leur passion  
 pour conseil, tombent en cest aucugle-  
 ment, que de se souleuer contre leurs Ma-  
 jestez, le mal sera doublement à plaindre,  
 par ce qu'auec leur ruine infaillible, elles  
 regretteront que des personnes de ceste  
 qualité manquent d'estre aupres d'elles,  
 pour preuue d'affection à leur seruice. Ce  
 que nul d'eux ne leur peut tesmoigner  
 qu'en embrassant, sans difference quelcon-  
 que, la querelle du Fils & de la Mere, tant  
 l'interest des deux est commun & insepa-  
 rable. Que ces Messieurs là considerent  
 que ce n'est pas chose excusable au subiect,  
 que de disputer sa cause l'espée à la main  
 contre son Roy. C'est aux pieds du Prince,  
 comme à des Autels de refuge où l'on doit  
 recourir, pour impetrer pardon si on a  
 failly, sans porter iamais les choses si à l'ex-  
 tremité, que le mal qu'on a faict, fasse vi-  
 ure en meffiance ceux qui le commettent,  
 la synderesc leur estant vn perpetuel bour-  
 reau qui les tenaille & martirise. Mauuaise  
 maxime au seruiteur, que de se vouloir fai-  
 re craindre à son Maistre!



Je desire de bon cœur, que ce mal-heur n'arriue à aucun d'eux, ains que se rendans capables d'un bon conseil, ils marchent sur les pas de leurs deuanciers, & qu'à leur exemple ils n'ayent pour obiect que le seruice de leur Roy. C'est là où travaille aujourdhuy de tout son pouuoir Monsieur le Duc de Guise, taschant de ramener vn chacun auprez de leurs Majestez. Non que ie n'aye si bonne opinion de la fortune de cest Estat, que quand les plus opiniastres se reculeroient de leur deuoir, le seruice de leurs Majestez ne laisseroit pas pourtant de se faire. Car encores que les Princes surpassent en naissance la commune Noblesse, il y en a neantmoins de ceste classe qui sont si genereux, qu'il portent des cœurs de Princes, & qui reuestus de l'autorité du Souuerain, font quelquesfois des exploicts si glorieux, qu'ils ne cedent à ceux des plus illustres Princes. La France est vn champ qui produict force courages de ceste trempe, & qui au defaut de ceux à qui les grandes charges sont deuës par leur extraction, ne manqueront pas de les remplir dignement, quand il plaira à leurs Majestez de les employer.

Nostre Histoire est pleine de plusieurs

faicts d'armes des Capitaines de nostre nation, qui ont souuent releué ceste Couronne panchante, comme firent vn Jean, bastard d'Orleans, vn la Hire, vn Ponton de Xaintrailles sous Charles septiesme, Dieu armant mesme en ce temps là le bras d'une simple fille, pour la protection miraculeuse de cest Estat. Aussi les Romains deferoient tât à la valeur des particuliers, qu'ils tiroiét quelquesfois du manche de la charuë les Generaux de leurs armées.

C'est donc aujourdhuy, ô braue & va-  
leureuse Noblesse! qu'il faut tesmoigner  
vostre zele & vostre amour enuers leurs  
Majestez, à fin que protegeans l'honneur  
& la dignité de la Monarchie, vous n'en  
souffriez pas le démembrement, par ce  
qu'en perdant l'autorité du Souuerain,  
vous perdriez vostre pere commun, &  
tomberiez comme Esclaues sous la tyran-  
nie & domination de quelques particu-  
liers, qui secoüans par leur felonnie le  
joug de l'obeissance qu'ils doiuent à leur  
Roy, rauiroient tout ensemble vostre li-  
berté. Je parle à vous tous, sans differen-  
ce de Religion, puis qu'il ne s'agit icy que  
de la grandeur de l'Estat, & que par la  
bonté de nos Roys vous estes tous in-



différemment admis aux charges & honneurs de la France, leurs Majestez n'ayans eu nul dessein par ceste action, d'alterer la moindre chose de leurs Edicts. La pluspart des Seigneurs de la Religion prétenduë réformée sont aujourdhuy à la Cour en credit & en estime, sans que leurs Majestez entrent en aucun ombrage de leur seiour auprès d'elles, tant elles ont de confiance en eux. Et si Monsieur le Marechal de Bouillon s'est seul retiré d'entre-eux, il est croyable que comblé d'années & de biens, il se sçaura si prudemment cōduire, qu'il viura le reste de ses iours en paix dans sa maison, sans attirer sur sa teste, ny sur celle de sa posterité, l'indignation d'un grand Roy, & la malédiction de tout le peuple.

Voila ce que nous auons à attendre du salut de la France, sous les heureux auspices de leurs Majestez, lesquelles en ceste tourmente se sçauront seruir des pilotes plus experts, pour faire surgir ce vaisseau à bon port. Car encorres que plusieurs vents soufflent au naufrage: si est-ce que les Anges tu,

relaires de cest Estat , veilleront à sa  
 conseruation , n'estant sans exemple  
 que la ieunesse des Roys soit ainsi agi-  
 tée. Vn Sainct Louïs en sentit les ef-  
 fects, par les mouuemens que luy sus-  
 citerent vn Comte de Bologne, vn  
 Duc de Bretagne, & vn Comte de  
 Champagne, sous le faux zele & pre-  
 texte du bien public ; qui est la cou-  
 leur dont tous perturbateurs teignent  
 ordinairement leurs mauuais desseins:  
 Mais la prudence de la Roynie Blan-  
 che de Castille sa Mere y sceut si bien  
 remedier, qu'apperceuant ( remar-  
 que l'Histoire ) que sous ombre  
 d'un pour-parler, ils se vouloient  
 saisir de la personne du Roy, Elle  
 eut recours à son gros canon, à sçauoir à la  
 Majesté du Roy, & menace ces Princes ar-  
 mez de les foudroyer, les declarans rebelles,  
 & criminels de lese Majesté, s'ils n'obeis-  
 soient. La fidelité des Parisiens est ce-  
 lebrée en ceste action, ayans pris les  
 armes, & s'estans mis en campagne  
 pour retirer le Roy, & pour rendre ces  
 Ligueurs tant plus odieux, & autoriser  
 le bon mesnage de la Roynie. Le Comte de  
 Champagne, dit vn autre Historien,

De Ser-  
 res rom. I



ayant mal fondé sa plainte, & voyant les affaires mal baster pour luy, recourut à la misericorde du ieune Roy. Et estant le Roy deuenu grand, il sceut bien venir à bout de tous les seditieux. C'est, adiousté-il, vne chose fatalle à tous Princes venus en bas aage, à estre Roys, & mesmement aux Roys de France d'auoir tousiours au commencement de leur regne des troubles & des seditions, & d'auoir esté tourmentez par aucuns de leurs subiects desireux de nouueauté : Mais aussi quand ils sont deuenus grands, ils ont bien sceu chastier ceux qui les ont broiillez en leur ieunesse.

Du hail-  
lan au  
liure de  
l'estat  
des af-  
faires de  
France.

Si Blanche de Castille fut si heureuse que de regner ainsi absoluë, nous ne nous promettons pas moins de felicité d'vne Marie de Medicis, laquelle reçoit aussi du Roy le mesme pouuoir & le mesme honneur que rendit Salomon à sa Mere. Car au témoignage de la parole de Dieu ce Roy se leua au deuant d'elle & l'adora, & se mist sur son trône. Et fut mis un trône pour la Mere du Roy, laquelle s'asist à la dextre d'iceluy. Si bien que nous ne pouuons reuerer le Fils, qu'en honorant la Mere, & receuant les commande-

3. Reg. 2.

demens des deux, sans difference ny distinction quelconque. Et encores que l'indignation du Roy soit tresiuste: si est-ce que suiuant la declaration que sa Majesté a faite aux yeux de cet auguste Senat, elle ouure les bras à ses subiects, semblable à vn de ces Césars, qui clement & pitoyable disoit qu'il aymoit mieux sauuer vn Citoyen; que de tuer mille ennemis. Dieu inspire donc vn si bon conseil au cœur des absents, que touchez de zele & d'amour enuers leur Patrie, ils ne s'enueloppent dans vn plus grand mal, ains retournans volontairement au seruice du Roy, ils ne se fassent acheter comme mercenaires, ny n'arrachent des mains de leurs Majestez aucune chose qui leur laisse ceste apprehension en l'ame, de ne pouuoir iouyr seurement, de ce qu'ils auroient plustost extorqué par violence, que receu amiablement par voyes iustes & raisonnables.

F I N.